

ЛЕЗГИ

Газет



Жуван Ватан, ватанэгълияр,
дидед чIал хуьх!

Дагъустан Республикадин Халкъдин Собранидин Президиумдин Къарар

Дагъустан Республикадин Халкъдин Собранидин ругуд лагъай сеферда эвер ганвай ругуд лагъай сессия тухунин гъакъиндай Дагъустан Республикадин Халкъдин Собранидин Президиумди къарар акъуд-зава:

1. 2017-йисан 6-февралдиз сятдин 10-даз Махачкъала шегъерда Дагъустан Республикадин Халкъдин Собранидин ругуд лагъай сеферда эвер ганвай ругуд лагъай сессия кыле тухун.

2. Сессиядал килигун патал агъадихъ галай месэла теклифзава: Дагъустан Республикадин Къили РД-дин Халкъдин Собранидиз ракурнавай Чар (гъахъ-гъисаб).

Дагъустан Республикадин Халкъдин Собранидин
Председатель **Х.ШИХСАИДОВ**
Махачкъала шегъер, 2017-йисан 30-январь. №27

1920 – йисалай акъатзава

№ 5 (10754) хемис 2 – февраль, 2017 – йис WWW.LEZGIGAZET.RU

Къимет “Дагпечатдин” киоскрай - 16 манат

Эбеди яз халкъдин рикIера

Шихмурад ШИХМУРАДОВ

26-январь. Махачкъалада, политехнический колледждин вилик гзаф инсанар кIватI хъанвай. Анал, вичин къуллугъдин везифаяр тамардайла, игитвилелди телефон хъайи Россиядин ФСБ-дин къуллугъчи, капитан Бабаев Артур Амирхановичан тIвар эбеди авуниз - мемориальный къул (плита) ачухуниз талукъарнавай мярекат кыле фена. Ам ачухай политехнический колледждин директор Гъасан Айгунова кIватI хъанвай-бур тебрикна ва игит хва тербияламышунай Амирхан Мирзаханович Бабаевачухсагъул лагъана, Артура и колледжда кIелайди, ам уьткъемвилинни дирибашвилин чешне, колледждин дамах тирди къейдна.

РФ-дин хатасузвилин органрин работникрин Ийкъахъ галаз алакълу и мярекат политехколледждин директордин тербияламышунин рекъай заместитель Анна Абдулаева кыле тухузвай. Ада гаф РД-дин “Координационный информационно-культурный центр” ГБУ-дин руко-



водитель Мухтар Амировач гана. “Баркаллу, игит рухвар хизанди, школади, обществоди тербияламышзавайди я. Артур Бабаеван къуллугъдин гъар са югъ - им цIудралди инсанрин уьмуьр къутармишун тир. Чпин чандилайни гил къачуна, инсанар къутармишунин рекъе хъайи къегъал рухвар вирида гъаиша рикел хуьн буржарикай я”, - лагъана М.Амирова.

КIватI хъанвайбурун вилик РД-дин Халкъдин Собранидин депутат Марат Алияров, МВД-дин УРПС-дин кадрийрин

учетдин ва наградадин отделдин начальник, къенепатан къуллугъдин подполковник Митлил Митлилов, МВД-дин пресс-къуллугъдин руководитель, подполковник Руслан Ибрагимгъажиев, жегъилрин крарин рекъай, печатдин ва информациядин министерствойрин векилар, Кеферпатан Кавказдин Исламдин ахтармишунрин Центрадин директор Руслан Гереев, СМИ-рин журналистар, Артур Бабаеван

► 2

Командующийдихъ галаз гуьруьш



Шикил - "president.e-dag.ru" сайтдай

30-январдиз Дагъустандин Къил Рамазан Абдулатипов Къиблепатан военный округдин умуми къушунрин 58-армиядин командующий, генерал-майор Евгений Никифоровач галаз гуьруьшмиш хъана. Гуьруьшда РД-дин Гъукуматдин Председателдин заместитель Рамазан Жафаровани иштиракна.

Абуру тIвар къунвай подразделенидин военный часть чи регионда аваз хуьни ва Дагъларин уьлкведин жегъилри

Россиядин армиядин жергеяра къуллугъ авун патал эвер гун тешкилуниз талукъ месэлаяр веревирдна.

Къейд ийин, Евгений Никифоровалай вилик ам алай къуллугъдин везифаяр генерал-майор Сергей Кузовлева тамарзавай. Е.Никифорова Коломенский къилин артиллериядин командный училище акъалтарна. 1991-2001-йисара ада десантдин ва гъужум ийидай къилдин 83-бригадада (Уссурийск шегъер) артиллериядин

взводдин, танкариз акси батареядин ва парашютно-десантный батальондин командир яз къуллугъна. Умуми къушунрин академия акъалтарайдалай къуллукъ ада 83-бригадада кIвалахун давамарна ва 2005-йисан мартдин вацра ам гъа и бригададин командирвиле тайинарна.

Е.Никифорова гъакIни РФ-дин Гъвадин къватрин Генеральный штабдин Военный академияда кIелна ва 58-армиядин командующийдин заместитель яз кIвалахна. 2016-йисан августдилай цIийи къуллугъдал тайинардалди генерал-майорди 20-Гвардейский умуми къушунрин армиядиз регъбервал гузвай (Воронеж шегъер).

58-армиядин къватри 1999-йисуз Дагъустан бандтешкилатрин гъужумрикай хвена, Чечнядин сад ва къвед лагъай кампанийра, Гуржистан ислягъвал хуьниз мажбурунин серенжемра иштиракна. Армиядин частар Дагъустандин, Кеферпатан ва Къиблепатан Осетиядин, Чечен Республикадин, Кабардино-Балкариядин ва Ингушетиядин мулкарал ала.

РД-дин Къилин ва Гъукуматдин Администрациядин пресс-къуллугъ

Музыкади садзава

Марина КЪАЗИЕВА

Мегъарамдхуьруьн райондин Цийи Гъепцегърин хуьрай тир уьмуьрдин юлдашар - Улубеговар санал яшамеш жез 42 йис хъанва. Абурухъ къуд веледни ирид хтул ава.

Амма хизандин къилин дамах неинки са Дагъустанда, гъакIни вири дуьньяда машгъур хъанвай, зур асирдин идалай вилик арадал гъайи хуси ансамбль я. Улубеговрин ансамблди Дагъларин уьлкведин тIварцIихъай вирироссиядин ва къецепатан уьлквейрин дережадин конкурсра, фестивалра иштиракзава. Адаз регъбервал гузвай Улубеговрин хизандин къил Муьгъуьдин Зейнединовичаз, милли музыкадин устад хуьниз килигна, мукъвал-мукъвал мехъеррик, шадвилин маса мярекатрик теклифзава. Мукъвара Улубеговрин баркаллу хизандикай “Йисан хизан - 2016” лишандик кваз кыле феийи вирироссиядин конкурсдин (“Хизан - адетар хуьзвай къул” номинациядай) гъалибчи хъана.

РФ-дин зегъметдин ва агъалияр яшайишдин рекъай хуьнин министерстводи, уьмуьрдин четин шартIара авай аялриз къумек гудай Фондуни, РФ-дин субъектрин исполнительный властрин органри регионрин уьмуьрда активнидаказ иштиракзавай хизанар хъяззавай. Конкурсда иштиракун патал уьлкведин 79 субъектдай 294 махсус чар атанвай. “Хизан - адетар хуьзвай къул” номинацияда 63 хизанди иштиракна. Конкурсдин тешкилатчийрин фикирдалди, Улубеговар руьгъдин ивира хуьзвай, бубайрин адетриз икрамзавай, дидебубавилин везифаяр чешнелудаказ тамарзавай бажарагълу хизандин векилар я. Чаз аял чIавалай чидай милли манияр тамарзавай абур яратмишунри сад-садав агудзава.

Лагъана кIанда, Улубеговрин хизандин ансамбль Муьгъуьдинан буба Зейнедин Улубегова арадал гъана. Алай вахтунда ансамблди 10 иштиракчи ава.

Муьгъуьдин Улубегова Мегъарамдхуьруьн райондин культурадин отделда кIвалахиз 40 йис хъанва. Гъа са вахтунда ада Цийи Гъепцегърал алай искусствойрин школадани зегъмет чIугвазва. Музыкадин жуьреба-жуьре алатар язаватIани, асул гъисабдай ам зурнечи я. 1990-йисуз Испанияда кыле феийи Виридуьньядин фольклордин фестивалда гъалиб хуьнай Муьгъуьдин Зейнединович 1-дережадин дипломдиз ва медалдиз лайихлу хъана. 1995-йисуз Австриядай тир музыкантрихъ галаз санал Москвадай авай “Лужники” стадиондал кыле феийи “Музыкадин гъаят” программада иштиракна. Муьгъуьдин Зейнединович РД-дин культурадин лайихлу къуллугъчи я. Улубеговрин хизанда чIехи хъайи аялрини - Ферозади, Эльнаради, Уружа ва Ифрата - хизандин ансамблди иштиракзава. Февралдин вацра Улубеговрин хизандив шадвилин гъалара премия вахкуда.



ОБЩЕСТВО

ЦIи дуьньядин тарихдин важиблу, чIехи вакъиадин - Октябрдин революциядин 100 йис тамам жезва. Ам гъакI, тахъай къасарна, рикел аламачирди хъиз алудун Россиядин Федерациядин Президентдизни хъсан ачухач.

► 4



ЯШАЙИШ

Къенин алаш-булаш хъанвай девирда яшайишдин къулай шартIар авачирвилляй, бязи чиновникрин “къайгударвал” себеб яз, нервияр тартибдикай хкатна, набут жезвай-бурни гъар сана гзаф хъанва.

► 8

Чехи гъалибвал


Гъар йисуз Красноярскда азадиз къуршахар къунай кыле физвай Иван Ярыгинан тварунихъ галаз международный турнирда иштиракун дагъвийр патал адетдиз элкъвенва. 27-29-январдиз Красноярскда Дагъустандин командадик квай пагъливанри амайбуруз къизилдин медалар тадач лугъудай зарафатарни пайда хъанвай соцсетра. Гъакъикъатдани, чи командади турнирда вад къизилдин - Заур Угуева (57 кг), Агъмед Чакаева (61 кг), Ильяс Бекбулатова (65 кг), Агъмед Гъажимегъамедова (74 кг), Даурен Куругълиева (86 кг), пуд гимийшдин - Артем Гебекова (57 кг), Гъажимурад Рашидова (61 кг), Расул Мегъамедова (97 кг), пуд буръунждин - Зелимхан Абакарова (57 кг), Нариман Исрапилова (57 кг), Мегъамедгъабиб Къадимегъамедова (70 кг) медаларкъазанмишна.



Акъажунра 17 уьлкведай тир 200-далай гзаф спортсменри залавилдин 8 категорияда къуватлубур тайнарзавай. Дагъустанвийри 5 категорияда чеб виридалайни зурба тирди раижна.

Дишегълийрин арада дагъустанви Милана Дадашевади (48 кг) пуд лагъай чка къуна.

Идалай вилик дагъустанвийрин команди И.Ярыгинан тварунихъ галай турнирда ихътин зурба нетижа садрани къалрайди тушир.



Чи командадин къуд лагъай "къизил" лезгийринди хъана. Ам Дербентдай тир лезги пагъливан Даурен Куругълиева къазанмишна. Даурена Маирбег Юсупован гъилик вердишвилер къачува. Къейд ийин, гъа и турнирда шаз Д.Куругълиева 3-чка къунай. Къастунал кевивална, ада са йисан вахтунда мадни са жерге агалкъунар къалурна ва нубатдин сеферда Красноярскда вич гъакъикъатдани международный турнирдин 1-чкадиз лайхлу тирди субутна.

Даурен Куругълиев финалда иранви Мохаммаджавад Эбрахимидал гъалтна ва 4:3 гъисабдалди мугъман кумукъна.

Международный турнирдин гъалибчиар ва призёрар 30-январдиз Каспийскда "Уйташ" аэропортуна кыле ведомстводин регъбер Мегъамед Мегъамедов аваз, РД-дин физический культураддин ва спортдин министерстводин векилри, мукъва-къилийри, дуствари къаршиламишна.

Анал министр Мегъамед Мегъамедова рикел хкана: "И турнирдин команда рекъе твадайла чна къизилдин анжах пуд медалдик умудар кутунвай".

- Амма къуна вилик эцигнавай план къве сеферда къилиз акъудна лугъуз жеда, - давамарна ада. - Са гъуъжетни алачиз, им лап члехи агалкъун я. Куь гъалибвилейки республикадин Кыл Рамазан Гъажимурадовичазни хабар ава, адани тебрикар агалкъунар тапшурмишнава. И акъажунра агалкъун хъуни квекай гзафбуруз мадни члехи турнирра иштиракдай рехъ ачухнава.

Даурен Куругълиева вичин ва хайи халкъдин твар вири дуньяда мадни са шумуд сеферда ашкара ийидайдахъ чун вири инанмиш я. Югъур хъурай!

Хъсан нетижаар

Мукъвара Каспийскда Али Алиеван тварунихъ галай Спортдин дворецда волейболдай Россиядин чемпионатдин высший "А" лигадин 13-тур кыле фена. И акъажунрилай къулукъ "Дагъустан" команда чемпионатдин турнирдин таблицада 2-чкадал хкаж хъана.

Сад лагъай гуръушда дагъвийри уралвийрин дестедал 3:0 (28:26, 25:21, 25:18) гъисабдалди гъалибвал къазанмишна. Къвед лагъай сеферда Екатеринбургдай тир "Локомотив - Изумруд" дестедин хийирдиз анжах са партия хъана ва нетижада гъалибвилеиз "Дагъустан" лайихлу хъана - 3:1 (21:25, 25:15, 25:19, 25:22).

Чемпионатдин турнирдин таблицада 1-чкадал алай "Ярославичалай" Дагъустандин командадихъ 4 очко тимил, вири - 51 - хъана.

Нубатдин бягъс дагъвийрин дестеди Стерлитамак шегъерда "Спортакадемия - ВРЗ" командадихъ галаз члугуна. 14-турдин 1-юкъуз чи команда гъакъикъатдани гъалиб жедайди къейдзавай стерлитамаквийри. Махачкъаладин клубдин тренерди майдандиз су-



перлигадин спортсменар, (абуркай 4 спортдин мастерар) акъуднавай, къугъунни лап итижлуди хъана. Сад лагъай юкъуз очкойралди вилик квай чи команда абуроз 3:2 гъисабдалди кумукъна.

Къугъунин къвед лагъай югъни тимил итижлуди хъанач. Дагъвийр, вилик квай юкъуз чпиз тренерди авур туьгъметар фикирда къуна, лап мукъаятдиз, хъсандиз, вири патари хъай фикир-фагъумна къугъваз башламишна. И къвалах вири тамашачийри къатлана, Стерлитамакдин

болельщикри, нефес къуна хъыз, чпин командадин тереф хуьзвай. Сифте къве сетда (волейболдин са югъ 4-5 сетдиз, партиядиз пай жезва) "Дагъустан" вилик квай, 3-сет "Спортакадемия-ВРЗ-дин" хийирдиз куьтягъ хъана. Амма 4-сет дагъвийр патал хийирлуди хъана ва Дагъустандин команди гъалибвал къазанмишна. Гила чи команда чемпионатдин турнирдин таблицада 5-чкадал ала ва нубатдин къугъуниз - Челябинскдин "Торпедодихъ" галаз гуръушдиз гъазур жезва.

Хъуьтлунь туризм

Хунзах райондин Сивух хуьруьн патарив 15-18-февралдиз регионрин уртах "Матлас" фестиваль кыле фида.

Фестивалдин программдик мурклади къунвай дагълариз вахтуналди ва четинвилеиз килигна акъахун, дагъдай тюбингал ва я алеррал алаз авахун, лыжайрал алаз фин, гирведилай канатдин куьмедал элячлун. Мадни башкъа, фестивалдин программдик иштиракчийр патал итижлу гъар жуьре конкурсарни квал: живедин нини туькьурун, живедин квал эцигун.

"Матлас" тешкилуник ва кыле тухуник "Группа Сумма" ООО-дин, "Матлас" ООО-дин, Хунзах райондин къилин, туризмдин ва край чирунин аялринни жанрин республикадин центрадин пай квал. Хатасузвал РФ-дин МЧС-дин Дагъустандин ПСО-дин къутар-



мишунардайбуру ва республикадин спортдин туризмдин федерацияди таъминардайвал я.

Гъалибчиар кубокрин, дипломрин, къыметлу пишкешрин иесийр жеда. Иштиракиз кланзавайбурувай Махачкъала шегъердин Титован тварунихъ галай куьчеда авай 2-нумрадин дараматдиз, "Дагъустан" ТИЦ-диз атана арза вугуз жеда.

Агалкъун мубаракна

Хазран КЪАСУМОВ

И йикъара Актау шегъерда аздаказ къуршахар къунай жаванрин арада Къазахстан Республикадин квенкъевичвал патал акъажунар кыле фена. Ана нинки и республикадин, гъакъни Узбекистандин, Туьркменистандин, Россиядин са шумуд субъектдай тир 200-далай виниз спортсменри иштиракна. И турнирда Эминхуьруьн ДЮСШ-дин Агъа Сталрин-Къазмайрин филиалда спортдин мастер Спартак Мегъамедован гъилик вердишвилер къачузвай Рамазан Жаватова 32 килограммдин залавилей 2-чка къуна.

С. Мегъамедова чаз лагъайвал, и акъажунра Рамазана 4 спортсмендин винел инанмишвилелди гъалибвал къачуна, финалда ам са баллдин тафават аваз, кчадин спортсмендиз кумукъна.

Р. Жаватоваз медаль, Къазахстан Республикадин спортдин ва физкультурадин комитетдин Гъуьрметдин грамота гана.

Мукъвара Спартак Мегъамедовни Рамазан Жаватов "Сулейман-Стальский район" муниципальный рай-



Чапла патахъай эрчи патахъ: С.Мегъамедов, Р.Жаватов ва Н.Эфендиев

ондин спортдин, туризмдин ва жегъилрин крарин рекъай комитетдин председател Надир Эфендиева къабулна. Ада жаван спортсмендиз ва адан тренердиз агалкъун мубаракна, Р. Жаватоваз комитетдин патай Гъуьрметдин грамота гана.

Куьрелди

ШАХМАТАР

Нариман КЪАРИБОВ

Алатай йисан эхирра Владикавказ шегъерда классический шахматрай жаван гадайрин ва рушарин арада СКФО-дин

чемпионат кыле фена. И барадай Дагъустандин жаван шахматистрин хъянавай командадик са шумуд кас дербентвийарни квай.

Къейдна кланда хъи, чемпионатда чи республикадин векилри виниз тир нетижаар къалурна - 11 медаль къазанмишна. Абурукай 4 къизилдин, 3 гимийшдин ва 4 буръунждин медалар я.

Гъамиша хъыз и сефердани Дагъустандин командадин агалкъунрик Дербент ше-

гъердай тир жаван шахматистрин пайни квал. Къиблепатан Дагъустанда машгъур шахматист-тренер Мирзе Манатилван ученикар тир Рухен Алиевади, Абдул Нурачева ва Денис Тучина 1-чкаяр къуна.

ШТАНГА

И мукъвара Георгиевск шегъерда пауэр-лифтингдай кыле феи акъажунра чи республикадин штангистрин командадик кваз

иштиракай дербентвийр тир Ислам Рамазанова ва Гъажи Рагъимова классический троборидай 1-чкаяр къуна.

СКФО-да лап хъсан штангистрин арада кыле феи и акъажунра иштиракун патал дербентвийр тир И.Рамазановаз ва Гъ.Рагъимоваз пуддин такъатар шегъердин собранидин депутат, эцигунардай материалар гъасилдай комбинатдин директор Нариман Мусаева гана.



Table with 6 columns: TV DAGESTAN, PGVK, PERVYI, ROSSIA 1, NTV, DOMASHNII, TV-CENTR. Contains program schedules for Friday, February 10.

Table with 6 columns: TV DAGESTAN, PGVK, PERVYI, ROSSIA 1, NTV, DOMASHNII, TV-CENTR. Contains program schedules for Saturday, February 11.

Table with 6 columns: TV DAGESTAN, PGVK, PERVYI, ROSSIA 1, NTV, DOMASHNII, TV-CENTR. Contains program schedules for Sunday, February 12.

Table with 6 columns: ПОНЕДЕЛЬНИК, ВТОРНИК, СРЕДА, ЧЕТВЕРГ, ПЯТНИЦА, СУББОТА, ВОСКРЕСЕНЬЕ, РАДИО. Contains program schedules for the week of February 13-19.

Программа газурайди - Насима ВЕЛИБЕГОВА

